

中書典故彙紀

中書典故彙紀卷五

仁和王正功輯

錢塘趙輯寧校補

恩遇

位列中書職清地近豈以寵祿光大爲榮哉然
一代之君必于輔弼之臣特加隆禮以爲異常
之眷不如是不足以表君臣一德之休及彙紀
之乃知數千百年以來當之不愧者固不乏人
其餘固寵邀榮無其德而有其遇者亦復不少
在讀史者尙論耳

漢高祖賜丞相蕭何劍履上殿入朝不趨

通鑑

武帝命田千秋爲丞相至昭帝時年老詔其得乘小車

入宮因號曰車丞相

漢書

元朔五年以公孫弘爲丞相封平津侯丞相封侯自弘

始

通鑑

按通志云漢制以列侯爲相惟公孫弘以布衣數年登相位封侯

韋賢年七十餘爲丞相五年以老病乞骸骨賜第一區丞相致仕自賢始年八十二薨

漢書

漢韋賢以老病致仕賜第一區黃金百斤安車駟馬罷

就第封扶陽侯

山堂肆考

漢霍光封博陸侯贊拜不名

同上

漢明帝以鄧禹先帝元勳每進見必令東向注云臣當北面尊之如賓故令東向

同上

平帝詔孔光曰國之將興尊師而重傅其令太師毋朝賜靈壽杖十日一賜食

分紀

漢張禹成帝朝拜相後罷就第賜安車駟馬朝朔望

山堂肆考

張禹每病輒以起居聞車駕自臨問之上親拜禹床下

漢書

劉蒼以殤帝冲幼欲令重臣居禁內乃詔張禹舍宮中給帷帳牀褥大官朝夕進食五日歸府每朝贊與三公

絕席

山堂肆考

鍾繇有疾時華歆亦以高年病朝見皆使乘輿入殿就坐是後三公有疾遂以爲故事

通志

按魏志云魏鍾繇有膝疾拜起不便每朝見使載車輿虎賁昇上殿就坐是後三公有疾遂爲故事

晉何曾乞遜位詔令每朝會乘輿入朝劍履上殿

通志

晉鄭冲杭表致仕詔曰太傅朝之雋老屢以年高告退宜聽其所執以壽光公就第凡杖不朝

山堂肆考

帝以衛瓘明允誠篤有匪躬之志其給千兵騎百人

起居注

宋廢帝加沈慶之几杖給三望車慶之曰我每履游田園有人時與馬成三無人與馬成二今乘此安所之乎

及所賜几杖並固讓不受

南史

齊傅昭爲中書通事舍人時居此職者皆權傾天下獨昭廉靜無所干預器服率陋明帝問之賜漆合竹盤勅曰卿有古人風故賜以古物

山堂肆考

魏主幸高允第惟有草屋數間布被縵袍厨中鹽菜而已魏主嘆息賜以粟帛拜其子爲郡守

北史

高允以老疾告歸鄉里尋復以安車徵至平城拜鎮軍大將軍中書監固辭不許詔乘車入殿朝賀不拜

通鑑

高允爲中書令文帝重之不名呼爲令公

文獻通考

隋高祖受禪李穆來朝高祖降坐禮之拜太師贊拜不名子孫在襁褓悉拜儀同一門執象笏者百餘人貴盛

當時無比

分紀

李世勣疾方云鬚灰可療上剪鬚爲之和藥世勣叩謝
上曰爲社稷非爲卿也

通鑑

房玄齡嘗以微譴歸第褚遂良諫曰玄齡翼贊聖功冒
死決策選賢立政勤力爲多自非罪在不赦不可退棄
若以其衰老亦當退之以禮上然之因幸芙蓉園玄齡
勅子弟汎掃門庭曰乘輿且至有頃上幸其第因載玄

齡還宮

同上

房玄齡疾甚帝命鑿苑垣以便候問親握手與決

唐書

許敬宗年老疾辭許期望日赴朝乘馬入禁門

同上

杜如晦疾篤太宗遣太子問疾又自臨視之及卒上語

及必流涕謂房玄齡曰公與如晦同佐朕今見公不見如晦矣

通鑑

李靖以疾遜位上曰朕嘉公意欲以公爲一代楷模故不相違及拜特進侯疾小瘳間二三日至門下中書平章事

同上

中書令岑文本卒太宗臨視撫之流涕其夕帝聞嚴鼓聲曰文本殞逝情深惻怛今宵夜警所不忍聞命停之

山堂肆考

魏徵疾甚徵初無正寢帝命輟小殿材爲營構五日畢并賜素褥布被以從其尚令中郎將宿其第動靜輒以聞藥膳賜遺無算中使綴道帝親問疾屏左右語終日

乃還後復與太子至徵第朝服拖帶帝悲慙拊之流涕
問所欲對曰婺不恤捍而憂宗周之亡帝將以衡山公
主降其子叔玉時主亦從帝曰公強視新婦徵不能謝
唐書

唐貞觀七年鄭公魏徵薨上命百官赴喪給羽葆鼓吹
陪葬昭陵上登院西樓望哭盡哀自製碑文并爲書石
山堂肆考

唐太宗時中舍高季輔上封事時上特賜鐘乳一劑曰
卿進藥石之言故以藥石相報

職官分紀

唐元宗時重午日賜丞相鐘乳

唐語林

唐太宗曰貞觀以前由武功定天下間闕草昧元齡功

也貞觀以後納忠諫正朕爲國家長利魏徵而已雖古

名臣何以加因解佩刀以賜二人

山堂肆考

唐孫處約爲中書舍人累年中書令杜正倫請更授一舍人與處約同知制誥高宗曰處約一人足辦我事何須多也

同上

武后信重狄梁公稱爲閭老而不名嘗從太后遊幸遇風巾墜馬驚不止太后命太子執鞵繫巾

通鑑

唐景龍時凡饗會豫遊惟宰相直學士得從春幸梨園並渭水祓除則賜柳園辟癘夏宴葡萄園賜朱櫻秋登慈恩浮圖獻菊花酒稱壽冬幸新豐厯白鹿觀登驪山賜浴湯池給香粉蘭澤從行給翔麟馬品官黃衣各一

帝賦詩學士等皆屬和當時所欽慕

全唐詩話

唐元宗置魏清潭砌以銀甄泥以石粉貯三辰酒一萬

車以賜當制學士等

雲仙雜記

代宗欲相李泌元載忌之帝不得已出泌約日後召以銀爲信忽除銀青光祿大夫泌知載敗已且相矣未幾果然

鄴侯傳

唐封敖爲學士拜中書舍人文思敏速武宗深重之嘗草陣傷邊將詔警句云傷居爾體痛在朕躬帝覽而善之賜之宮錦

山堂肆考

唐苗晉卿年老蹇甚乞間日入政事堂帝優之爲御小延英召對

同上

唐魏元忠兼中書令請歸鄉拜掃特賜錦袍一領銀千兩并給千騎四人充其左右

同上

張說進中書令詔說與禮官學士置酒集仙殿曰朕今與賢者樂于此當遂爲集賢殿乃下制改麗正書院爲集賢殿書院而授說學士知院事

孔帖

姚崇無居第寓居罔極寺以病謁告上遣使問之日數十輩源乾曜請遷崇于四方館仍聽家人入侍疾崇固辭上日設四方館爲官吏也使卿居之爲社稷也恨不可使卿居禁中耳

通鑑

姚宋二人每進見上輒爲之起去則臨軒送之

同上

唐宋璟爲右丞相張說爲左丞相源乾曜爲太子少傅

同日拜帝賦三傑詩自寫以賜

山堂肆考

宋璟爲相朝野人心歸美馬一日春晏帝以所用金筋令內臣賜璟曰非以賜卿金表卿直也

開元遺事

永徽四年李勣已畫像于凌烟閣至是帝復命圖其形自序之又詔得乘小馬出入東西臺卑官一人迎送

唐書

盧懷慎卒帝經其墓見碑表未立停蹕臨視泫然流涕詔官爲立碑令中書侍郎蘇頌爲文帝自書之

山堂肆考

馬周病渴帝幸翠微宮求勝地爲構第詔尙食具膳上使醫者視護躬爲調藥

唐書

溫彥博家貧無寢殯于別室上命有司構之

同上

杜佑拜檢校司空同中書門下平章事歲餘乞致仕詔
三五日一入中書平章政事佑每進見天子尊禮之而
不名分紀

張文瓘有時移疾他宰相奏事帝必問與文瓘議未若
不者曰往共籌之

唐書

唐權德輿自起居舍人進中書舍人獨直兩省數日一
還舍乃上言左右掖垣承天子詔命奉行詳覆各有攸
司舊制分曹十員以相防檢大抵事有所壅則吏得爲
非四方聞者或以朝廷爲乏士要重之司不宜久廢帝
曰非不知卿之勞但擇如卿者未得其人耳

唐職林

李世勣卒帝舉哀光順門輟朝七日葬之日帝與太子

幸未央城哭送

唐書

張說有疾中使候問帝手寫方賜之歿舉哀光順門

同

蘇頲薨及葬日元宗遊咸宜宮將舉獵聞頲喪出愴然

曰蘇頲今日葬吾寧忍嬉遊乎遂中路而止

唐語林

貞元中上謂楊嗣復曰汝父爲舍人稱職今汝繼書命

成一家言堂構國華在于此舉

通鑑

唐李吉甫盛贊天子之德憲宗欣然李絳曰今日西戎
內訌烽燧相接誠陛下焦心求濟時之畧渠便高枕而
臥哉帝入謂左右曰絳言骨鯁真宰相也遣使者賜醪

釀酒

唐書

魏徵元孫稠貧甚以故第質錢于人憲宗出內庫錢二

千緡贖以賜稠

通鑑

鄭覃以疾乞去位有詔許以五日一入中書商量政事

職官分紀

唐吐突承瓘欲於軍中爲帝立聖政碑李絳以爲不可許憲宗初甚怒絳語不已卒大開悟除絳中書舍人翌日又面賜紫衣金魚上親爲擇良笏勉之曰爾當無易此心

續通典

太和五年以裴度爲司徒平章軍國重事度以老辭位

故有是命仍詔三五日一至中書

通鑑

唐李揆同平章事帝曰卿門第人物文學皆當世第一
信朝廷之羽儀乎

山堂肆考

帝視案上麻謂劉瑑曰爲朕擇一今日瑑跪曰某日良
帝笑曰是日卿可遂相卽召同中書門下平章事

同上

唐李載義賊平之後詔同平章事賜白玉帶以示殊禮
同上

宋太平興國八年召閣下舍人李穆宋白賈黃中呂蒙
正李至入院時承旨扈蒙贈詩賀之有五鳳齊飛入禁
林之句其或觀稼於南薰門賞花于含芳園春盡嚴蹕
百司景從幸國西之金明池下雕輦登龍舟都人駕肩
百樂具舉憩瓊林苑由複道御層樓臨軒置酒以閱繁

盛兩制必侍從焉至上林春融千花萬卉妍麗冠絕上
必曲宴宰衡勳舊召兩制詞臣俯龍池垂金鈞舉觴賦
詩終日而罷

續翰林志

先是宋太宗召宰相近臣賞花于後苑謂之曰春風暄
和萬物暢茂四方無事朕以天下之樂爲樂宣命侍從
詞臣賦詩召輔臣三司使翰林樞密直學士尙書省四
品兩省五品以上三館學士宴于後苑賞花釣魚命羣
臣賦詩因習射水心殿賞花曲宴自此始

通鑑

禁中名花開故事惟親王宰臣卽中使插花餘皆自戴
暹水燕談

上遣使以璽書賜趙普曰朕以居守之重慮煩耆耄維

師之命用表尊賢仍賜銅羊上樽酒醴太師其愛精神以福眷注之意

東都事畧

元佑元年四月詔守太師致仕文彥博赴闕獨班起居減拜肩輿至下馬處子弟一人扶掖出入儀制依現任宰臣

會要

王冀公以參知政事判大名府召還加邑封契丹方請好真宗欲重其事冀公入謝特令以衣帶鞍馬賜之

職

官分紀

趙普卒上撰神道碑銘親八分書以賜之遣右諫議大夫范杲攝鴻臚卿護喪事賻絹布各五百疋米麩各五百石葬日有司設鹵簿鼓吹如式

宋史

嘉祐八年上元夜賜中書樞密院御宴于相國寺羅漢院國朝之制歲時之賜宴多矣自兩制已上皆與惟上元一夕祇賜中書樞密院雖前兩府現任使相皆不得與也

歸田錄

故事生日賜禮物惟親王見任執政官使相然亦無外賜者元豐中王荆公罷相居金陵除使相辭未拜官止特進神宗特遣內侍賜之蓋異恩也

石林燕語

趙普罷爲武勝軍節度使帝作詩餞之賜宴長春殿普奉詩泣曰陛下賜臣詩當刻石與臣朽骨同葬泉下帝謂宰相曰普有功國家朕昔與遊今齒髮衰矣不欲煩以樞務擇善地處之因詩以導意普感激泣下朕亦爲

之墮淚宋琪對曰昨普至中書執御詩涕泣謂臣曰此生餘年無階上答庶希來世得効犬馬力臣昨聞普言今復聞宣諭君臣始終可謂兩全

通鑑

舊制宰相以未時歸第是歲大熱特許趙普夏中至午時歸私第

宋史

淳化三年趙普三上表乞骸骨拜太師封魏國公給宰相俸料令養疾俟損日赴闕

同上

普自再相帝每優禮之免朝謁止日赴中書視事有大政則召對至是以力疾求致仕帝不得已授太保兼中

書令西京留守

通鑑

宋賈黃中參知政事召見其母王氏賜坐與詔曰教子

如此真可謂今之孟母因賦詩以美之賜予甚厚

事畧

呂端參知政事一日宴後苑釣魚賜之斷句曰欲餌金
鈎殊未達磻溪須問釣魚人端和以進曰愚臣鈎直難
堪用宜問濠梁結網人既而端遂拜相君臣曾遇故事
賡歌此與唐虞賡載事雖異而實同也

天祿識餘

趙鼎爲相上御書車攻詩宣示宰政鼎入謝上曰車攻
宣王中興之詩今當與卿等勉勵以修政事

言行錄

李文正以司空致仕於家燈夕上御樓以安輿就其第
召至賜坐上親酌御樽飲之選簡核之精者賜之曰叻
兩入中書未嘗有傷人害物之事宜今日所享如此

同

上

眞宗初卽位對宰相皆不呼名呂端等再拜懇請帝曰
公等願命元老朕何敢比先帝乎

張齊賢以司空致仕入辭許二子扶掖升殿命益坐茵

爲三 宋史

畢士安屢以病求免不允優詔敦諭不得已復起視事
至崇政殿廬疾暴作眞宗步出臨視 同上

宋太宗得通天犀命工爲二帶一以賜寇準及在雷州
遣人取自洛中旣至數日沐浴朝服束帶北面再拜就
榻而卒 同上

趙普卒之先一歲生日上遣其子承宗齎器幣鞍馬就
賜之次歲普已罷中書令故事無生辰之賜特遣普姪

婿左正言直昭文館張秉賜之禮物

同上

呂端爲相持重識大體帝手札諭中書每事必經呂端
參酌乃得奏聞

通鑑

兩府有大事上必曰曾與王旦議否旦以爲可卽可之
山堂肆考

宋眞宗幸呂蒙正第曰卿子孰可用對曰諸子不足用
姪夷簡宰相才也眞宗識其姓名於屏風

通鑑

宋眞宗每見呂端入對肅然拱揖不以名呼又以端姿
儀瓌大宮庭陞峻特令梓人爲納陛

同上

王旦疾篤帝臨問親調藥并薯蕷粥賜之遣內侍問者

日至三四

同上

王旦在眞宗時中外皆以爲有宰相器嘗奏事下殿眞宗目送之曰與朕致太平必斯人也

同上

王旦曰畢士安官至輔相而四方無田園居第沒未終喪家用已屈眞不負陛下之所知矣帝感歎賜其家白金五千兩

同上

呂端子多不同處舊第已質於人帝聞之出內庫錢贖還之令其聚居端長子蕃負人息錢甚多帝別賜內庫金俾償之蕃弟荀與西京差遣仍令內侍省置簿爲掌餼課給其家詔樞密院察其妄費

同上

先是呂夷簡感風眩疾詔拜司空平章事疾稍愈命數日一至中書裁決可否夷簡力辭帝降手詔曰古謂髭

可療疾今剪以賜卿至是帝御延和殿召見勅乘馬至殿門命內侍取杙子輿以前夷簡辭避久之詔給扶母拜乃罷相改授司徒同議軍國大事

同上

按石林燕語云慶厯初呂許公在相位以疾甚求罷仁宗疑其辭疾欲親視之乃使乘馬至殿門坐椅子輿至殿陛命其子

公弼

掖以登既見信然乃許之

王旦素羸多疾連年求解機務不許乃拜太尉侍中五日一赴起居入中書遇軍國重事不限時日入預參決

分紀

至和中時以張商英能立異同更稱爲賢帝因人望而相之時久旱彗星中天商英受命是夕彗星不見明日

雨帝大喜書商霖二字以賜之

同上

塵史謂唐時宰相乘馬五代始用檐子

肩輿也

本朝近年

惟文潞公以太師平章軍國事司馬溫公始爲門下侍郎尋臥疾就拜左相不可以騎二公並許乘檐子皆異恩也

池北偶談

按唐語林云開成中李石作相早朝中箭遂出鎮江陵自此宰相坐檐子出入蓋起自唐也

文彥博自河南入朝帝喜其輔立英宗而不伐其功加兩鎮節度使將行賜讌瓊林苑兩遣中使遺詩祖道當世榮之

通鑑

宋神宗夕時召知制誥鄭獬對內東門小殿命草吳奎

知青州及張方平參知政事制草畢賜雙燭送獬歸舍
人院二府無知者明日進草遂付中書出誥

丁未錄

宋元祐中彭汝礪拜中書舍人賜服金紫以爲有古人

風

山堂肆考

哲宗初詔司馬光免朝觀許乘肩輿三日一入省光不
敢當曰不見君不可以視事詔令子康扶入對遼人聞
之敕其邊吏曰中國相司馬矣毋輕生事開邊隙

通鑑

蘇東坡爲中書舍人上賜御書紫薇花詩一首坡進詩
落句云小臣願對紫薇花試掃尺書招贊普

山堂肆考

呂公著以老懇辭位乃拜司空同平章軍國事詔建第
于東府之南啟北扉以便執政會議凡三省樞密之職

皆得總理間日一朝因至都堂其出不時蓋異數也

通鑑

熙寧中收復熙河百官班賀神宗特解所繫玉帶賜王荆公且使服以入賀荆公辭上待服而後進班大觀中收復青唐以熙河故事復賜蔡魯公

石林燕語

熙寧元年富弼入覲許肩輿至殿門神宗御內東門小殿命其子掖以進坐語從容訪以治道

宋史

神宗時王安石有所建明却之曰富弼手疏稱老臣無所告訴仰屋竊嘆者卽當至矣其敬之如此

同上

司馬光元祐元年復得疾詔朝會再拜勿舞蹈

同上

司馬光卒太皇太后與帝臨其喪明堂禮成不賀毳以

一品禮服賜銀絹三千

同上

陳康伯卒其子偉節除直秘閣安節賜同進士出身辭不受孝宗手札批諭寄留省中以成其美

同上

孝宗禮遇陳康伯殊渥但呼丞相而不名諭子安節婿文好謙掖以見減拜賜坐許肩輿至殿門仍給扶非大事不署

同上

韓世忠死賜朝服貂蟬冠水銀龍腦以斂

同上

何執中臥疾賜寬告他日退朝命止赴六參起居退治省事明年乃以太傅就第許朝朔望儀物廩稍一切如居位時

同上

神宗開天章閣對輔臣呈官制除目詔中書檢正官王

震等執筆入記聖語面授震左司員外郎使自書除目
時論榮之 九朝通畧

太宗皇帝留心儒術旌賞文翰時內閣之臣始召赴曲
宴或令和詩舍人從游宴自此始 職官分紀

元祐初文潞公爲太師呂申公爲左僕射皆高年特賜

免拜 石林燕語

文彥博致仕居洛司馬光言其宿德元老宜起以自輔
太后將用以三省長官言者以爲不可乃命平章軍國
重事六日一朝一月兩赴經筵班宰相上 通鑑

平章軍國重事元祐中置以文彥博太師呂公著守司
空相繼爲之序宰相上所以處老臣碩德特命以寵之

也故或稱平章軍國重事或稱同平章軍國事五日或兩日一朝非朝日不至都堂其後蔡京王黼以太師總三省事三日一朝赴都堂治事

宋史百官志

蔡京每侍上恆以君臣相悅爲言帝時乘小輦頻幸其第命坐傳觴畧用家人禮京謝表云主婦上壽請醕而肯從稚子牽衣挽留而不去

仇池筆記

徽宗政和二年詔蔡京三日一至都堂議事七年命五日一赴都堂治事

通鑑

徽宗宣和五年以收復燕雲宰執皆進位而命王黼治三省事賜玉帶

同上

紹興二十年秦檜有疾詔執政赴檜第議事十二月甲

子檜始朝命肩輿入宮門二孫扶掖升殿不拜 同上

按南部新書云丞相肩輿元和後也

宋孝宗厚張浚而不名每遣使視浚飲食多少肥瘠如何 同上

淳熙六年以史浩爲右丞相兼樞密帝謂之曰自葉衡罷虛席以待卿久矣 同上

宋恭帝進王燾平章軍國重事如文彥博故事五日一朝一月兩赴經筵其朝參起居並免拜 宋史

宋寧宗開禧元年五月平章軍國事韓侂胄序班丞相之上三省印並納其第 韓侂胄傳

按宋史百官志云時討論典禮以平章軍國事爲名

蓋省重字則所預者廣去同字則所任者專邊事起
乃命一月一朝省印亦歸其第宰相不復知印

紹定三年詔史彌遠十日一赴都堂治事

通鑑

史彌遠以母憂歸治喪太子請賜第行在令就第持服
以便咨訪

同上

賈似道專權竊位日久尊寵日隆位皆在丞相上

同上

度宗以似道有定策功每朝必答拜稱之曰師臣而不

名朝臣皆稱曰周公

同上

似道以去要君帝至拜留之萬里以身掖帝云自古無
此君臣禮陛下不可拜似道不可復言去似道不知所
爲舉笏謝萬里曰微公似道幾爲千古罪人

同上

似道上疏乞歸養帝命大臣侍從傳旨固留日四五至中使加賜日十數至夜卽交臥第外以守之特授平章軍國重事一月三赴經筵三日一朝治事都堂賜第西湖之葛嶺使迎養其中似道于五日一乘湖船入朝不赴都堂治事吏抱文書就第呈署大小朝政一切決于館客廖瑩中堂吏翁應龍宰執充位而已

同上

似道屢稱疾求去帝涕泣留之不從詔六日一朝一月兩赴經筵又詔入朝不拜朝退帝必起避席目送之出殿廷始坐繼復詔十日一朝

同上

張昇請老帝曰太尉勤勞王家詎可遽去但命五日一至院進見毋舞蹈

同上

神宗初欲爲韓魏公神道碑王禹玉爲學士密詔具故事有無禹玉以唐太宗作魏徵碑高宗作李勣碑明皇作張說碑德宗作段秀實碑及本朝太宗作趙普碑仁宗作李用和碑六事以聞於是御製碑文賜魏公家或云卽禹玉之詞

石林燕語

金世內燕惟親王公主駙馬得與世宗特召石琚入曰使我父子家人安然無事有今日之樂者此人力也

金史

張浩有疾世宗命入朝毋拜許設座殿陛之東遇有咨訪然後進對其餘大政就第裁決

同上

元至元六年加大丞相伯顏元德上輔功臣之號賜七

寶玉書金符

通鑑

禱盃溫敦思忠初罷相貞元二年海陵季三品以上官幸其第使以家禮見遂命乘馬從入宮拜太傅領三省事封齊國王已而罷中書門下省不置領三省事置尙書令位丞相上卽以思忠爲之特置散從八人聽隨至宮省賜坐

元史

趙世延年高多疾許乘小車入內

同上

賀勝有足疾請老帝曰臥理足矣賜小車出入禁闥

同上

仁宗卽位解御衣賜張珪明日復召謂曰欲賜卿寶玉非卿所好乃以帨拭面額納珪懷曰朕澤之所存朕心

之所存也

同上

張珪病帝詔常見免拜跪賜小車得乘至殿門

同上

鐵木兒塔識每入直帝出宿宣文閣賜坐榻前詢以政

務夜分乃罷

同上

洪武十五年詔立諸殿閣官以寵侍從儒臣之賢者於

是金華吳公

沉

由太史屬拜東閣大學士親製詔文以

授之

西京問錄

永樂中賜內閣七人二品織金紵絲衣

池北偶談

永樂二十一年楊榮扈從西征一應軍務悉命榮掌之

日夕或三接或五接每以楊學士稱之而不名

翰林記

明世文臣無生拜三公者自張居正始

明史稿

故事入內閣者曰同某人辦事至張居正引張四維入直曰同元輔張居正辦事同上

帝以楊一清老臣恩禮加渥免常朝日講侍班朔望朝參令晨初始入閣視事同上

永樂元年楊榮等七人侍帝曰天下事朕與若等相商非若六卿分理並賜三品服明名臣記

永樂十八年四月上在西內圓殿召學士楊榮金幼孜至殿外命坐賜酒食其羹糜蓋出御前調和珍異非常且復有上尊熟食酪漿櫻桃之賜所賜上尊封識皆有墨印洞庭春色四字翰林記

永樂中上時至閣中必有厚賚或閱諸學士及庶吉士

所製詩文詰問評論以爲樂

同上

永樂中上召學士楊士奇等七人謂之曰朕卽位以來爾等朝夕在左右敬慎勿怠宜益謹厥終士奇等對曰臣等猥蒙委任敢不勉圖報稱上大悅賜象笏幘頭公服尋賜二品織金紵衣士奇等入謝且言恩禮太過上曰卿等翊贊之功不在尙書下故特賜二品服以示旌異豈爲過哉

同上

永樂初萬壽聖節學士侍宴奉天殿近侍及修史館宴中左門正旦元宵端午重陽冬至臘日等節往往宴于禁庭皇后皇太子千秋節亦如之若御三殿筵宴于內閣學士尤隆或有撤御筵玉食以遺其父母者

同上

明故事禁中不得舉火雖閣老亦退食於外宣宗過城上令內監覲閣老何爲方退食于外上曰曷不就內食對曰禁中不得舉火上指庭中隙地曰是獨不可置庖乎今烹饌處是也自是得會食中堂

震澤長語

宣宗又一日過城上覲閣老何爲曰方對奕何以不聞落子聲對曰碁用紙上笑曰何陋也明日賜象牙棋一副至今藏閣中

同上

宣德二年黃淮請老賜葬淮父來謝賜游西苑與公侯伯師傅尙書十一人俱有肩輿登萬歲山宴山麓比餅又宴太液池論曰明年朕生日卿其復來至期淮至帝

喜

明通紀

宣德四年十月上臨視文淵閣少傅楊士奇太子少傅楊榮太子少保金幼孜學士楊溥魯縉王直王英侍讀李時勉錢習禮侍講陳循等侍上命典籍取經史親自披閱與士奇等討論已詢以時政從容密勿者久之命中涓出上饌酒饌賜士奇等并賜纂修實錄等官士奇等叩首謝上曰朕聞有道之朝願治之主崇禮儒碩講求治道卿等爲朕保傅與諸學士皆處秘閣朕躬至訪問冀有所聞耳稍暇當復至卿等必有所陳論也已而親製詩賜士奇等

宣宗實錄

明宣宗皇帝詩秘閣弘開當巽隅充棟之積皆圖書
仙家蓬萊此其處上與東壁星相符罷朝閒暇一臨

視衣冠左右環文儒瓊瑤鏘鏘清響振寶鼎馥馥香
煙敷維時日上扶桑初始看瞳矐約綺疏忽已燦爛
明金鋪從容燕坐披典謨大經大法古所訓講論啟
沃良足娛朝廷治化崇文教旦暮切磋安可無諸儒
志績漢仲舒豈特文采陵相如玉醴滿賜黃金壺最
哉及時相勵翼輔德當與夔龍俱庶幾致治希唐虞

御製集

宣德四年十月車駕幸文淵閣周視大學士寓直之所
命增蓋屋宇兼賜飲饌器用次日謝恩已而復賜詩及
寶鈔學士李時勉等皆與焉

翰林記

宣德初內閣學士楊士奇等被賜玉帶瑪瑙鶴頂龜筍

琥珀花犀合香諸帶及龍骨等繫腰皮裘黑貂銀鼠帽
同上

宣宗初卽位起學士李時勉用之一日幸文淵閣賜諸
學士飲呼時勉謂曰卿非朕安得飲此酒時勉頓首謝
他日侍遊東苑上賜時勉酒酌以上所御金甌時勉辭
曰臣可與陛下同飲不敢與陛下同器上悅命賜以銀
爵旣醉上出御製詩俾和之同上

楊士奇兼華蓋殿大學士仁宗卽位曰朕倚義原吉士
奇宜盡言匡朕洪熙元年加少保兵部尙書三俸並給
明名臣記

宣德中賜楊溥第在東安門外天順元年冬賜李賢甲

第一區 東里集

仁宗建弘文閣於思善門作印章命翰林院學士楊溥
掌閣事侍講王璉佐之親舉印授溥曰朕用卿等于左
右非止助益學問亦欲廣知民事爲理道之助卿等如
有建白卽以此封識進

明典故紀聞

天順中賜大學士李賢陳文等玉帶學士呂原等金帶
暨玉杯錦服貂帽之賚歲無虛月

翰林記

成化中始賜內閣兩連椅藉之以褥又賜漆床錦綺衾
褥以便休息閣內則夏秋懸朱筠簾冬春紫毡簾

瑣綴

錄

正德五年寧夏平賜大學士賞功金牌

翰林記

張孚敬入內閣章聖太后賜金綰建議請嚴諭私謁重
制詔十三年加少師命有司爲作寶綸樓

吾學編

明宣德三年七月召尙書兼學士蹇義夏原吉楊榮楊
士奇等同游東苑上命臨河舉網得魚數尾令中官具
酒饌賜魚羹旣而賜以金帛絳環玉鉤等物又賜宴于
東廡被旨盡醉而歸

翰林記

宣德八年四月命楊士奇等游西苑中官傳上命賜黃
封之酒御厨之珍爵數行時久未雨忽陰雲東來微雨
霑席相與引滿勸酬盡醉而出

東里集

宣德六年七月上幸大學士楊士奇宅第

大政記

宣德以來閣老及經筵日講官間賜冠服必緋袍金帶

成化端午節賜閣老織金麒麟大紅紗各一端因并賜

金鑲玳瑁帶

瑁綴錄

世宗賜大學士費宏詩云睦茲忠良副倚賴舜臯彷彿
康哉廣朕纘大服履昌運天休滋至卿其承沃心輔德
期匪懈未讓前賢專令名又賜石瑤詩云黃閣古政府
輔導須才良卿以廷薦入性資推剛方在木類松栢在
玉如珪璋可否每獻替忠實無他腸又賜賈詠詩云卿
本中州俊簡在登台衡君臣際良難所貴德業并朕固
亮卿志夙夜懷忠貞卷阿有遺響終聽鳳凰鳴又賜楊
一清詩云邇年西陲擾起卿督邊方寬朕西顧憂威名
滿華羌子承祖宗緒志欲宣重光卿展平生猷佐朕張

皇綱 世宗實錄

大學士徐階八十賜大紅蟒一襲彩幣四表裏銀五十

兩 同上

大學士郭朴八十加月米四石人夫八名

同上

江陵在直廡感疾上御文華殿後閣親調椒湯使使賜之又盛暑御講上先就相君立處令內使搖扇殿角試其涼暄隆冬進講以氈一片鋪丹地上恐相君立處寒也 筆塵

嘉靖間供事內庭奉元修者宰臣嚴分宜以衰老得賜腰輿至八十再賜肩輿其事同而恩稍下者則夏文愍翟文懿俱賜乘馬二公因私用腰輿上聞以爲僭心銜

之夏被禍翟被逐已胎於此矣

野獲編

撰文諸臣初時不過宰輔既而郭勳崔元以勛爵入陸炳朱希孝以緹帥入李春芳董份以學士入人數既增直房有限得在列者方有登仙之美不復覺其湫隘且房俱東西向受日良苦惟嚴分宜最後得另建面南一所甚寬潔且命賜白金範爲飲食器及他食物甚備分宜處之凡十餘年分宜逐卽以居徐華亭徐徙居其內亦五年嚴之晚節以屢出直見疏徐懲其敗每遇上命到閣理事或賜沐至家輒云戀念聖躬起居不忍暫舍而出上以是益憐之高新鄭最後入直其辨胡給事疏中云所居凡四層十六楹最敞則亦分宜直房之亞矣

同上

明張少師孚敬方少保獻夫翟殿學鑾於癸巳歲游萬歲山諸處有春游唱和集戊戌上奉慈寧汛西苑詔郭翊公勛李夏二少傅顧少保從後居西苑齋宮四臣與分宜不時宣召至夜分多寓宿內時未有直廬也已亥始賜無逸殿左右廂分居多應制供青詞之作今列于後太師郭翊公勛太師朱成公希忠太保崔都尉元太

傅仇咸寧鸞都尉景和少保方安平承裕太保陸都

督炳太保朱都督希孝已上勳戚武臣少師夏殿學言

少傅翟殿學鑾少師嚴殿學嵩少保費尙書宏宮保張

閣學治少傅李殿學本少師徐殿學階歐宗伯德宮保

李太宰

黜

宮保王宗伯

用賓

少保吳宗伯

山

少傅袁殿

學

輝

宮保嚴殿學

誦

少保李殿學

春芳

少保郭殿學

朴

尙書高殿學

拱

諸公前後許乘馬出入獨嚴以年老得

乘肩輿此希特之典也

鳳州筆記

世宗甲戌四月賜輔臣張居正宅揆保衡四字呂調陽

同心夾輔四字六卿正已率屬各一講臣六人責難陳

善各一

春明夢餘錄

世宗又賜江陵弼子一人永

天命爾維麩彘汝作鹽

梅及捧日精忠堂閣之扁不可計數一日謂江陵曰朕

爲先生書太岳二字江陵曰主臣不敢上乃已

筆塵

崇禎十二年九月命大學士楊嗣昌以原官兼兵部尙

書督師討流寇賜上方劍宴于平臺後殿上手觴嗣昌

三爵賜以詩

國權

御製詩云鹽梅今暫作干城上將威嚴細柳營一掃
寇氛從此靖還期教養遂民生書用黃色金龍蠟箋
厚如指甲長四尺餘濶一尺六七寸字大二寸餘後
一行署云賜督師輔臣嗣昌又一行署云崇禎十二
年九月前鈐御筆之章引首一寶上方中書一押大
體似明德二字合成者鈐一表正萬邦之寶

孤兒籟

天錄

順治十四年七月洗馬王熙陞弘文院學士時熙父崇
簡任國史院學士上諭曰父子同官古今所少以爾

誠恪特加此恩

詞林典故

康熙元年正月 諭吏部原任大學士希福范文程寧完我額色黑歷任內院贊理機務効力最久勤勞素著其子宜加擢用以示鼓勵范文程子范承謨額色黑子塞色黑已補授內院學士希福寧完我各一子亦著以學士用

同上

康熙時 特命皇長子臨故少傅大學士王熙之喪拜奠舉哀特恩異數都人驚傳以爲未嘗有也

上諭以世祖皇帝舊臣故加殊禮內閣部院諸臣公疏

謝恩

香祖筆記

東閣大學士兼吏部尚書熊賜履以老病請告允之仍

令居京師備顧問 同上

康熙十六年 諭大學士等朕不時觀書寫字近侍內並無博學善書者以致講論不能應對今欲於翰林中選擇二員常侍左右講究文義但伊等各供厥職且在 外城不時宣召難以卽至著于城內撥給閑房停其陞轉在內侍從數年之後酌量優用再如高士奇等能書者亦著選擇一二人同伊等入直尋大學士等列名上請 命侍講學士張英加食正四品俸供奉內廷書寫之事止令高士奇在內供奉加內閣中書銜食正六品俸居住房屋內務府撥給又令大學士傳 諭張英高士奇選爾等在內供奉當謹慎勤勞後必優用勿得干

預外事

詞林典故

康熙四十四年五月 上御淵鑿齋召大學士張玉書
陳廷敬等入至步雲石賜坐賜饌又賜荷花一瓶隨命
由蕊珠院延賞樓泛舟回直廬 同上

大學士張文端公賜第在西華門外大石槽至今子孫
世守之文和公又賜第在護國寺之旁迨文和公罷歸
卽以賜史文靖公蔣文肅公賜第在藜光橋卽今大學
士文恪公所居第也鄂文端公賜第在帥府衙衛陳文
勤公賜第在東四牌樓協辦大學士孫文定公賜第在
安定門後又爲前協辦大學士汪文端太宰賜第朱文
端公雍正時賜第在外城乾隆初年賜第在內城

康熙中每冬賜內閣及學士日講起居注官貂裘人一

襲自癸丑後滇黔用兵輟賜

池北偶談

康熙四十九年二月提督四驛館太常寺少卿員缺

特旨以主事李敏啟陞補故大學士高陽文勤公

孫

也 上之篤念故舊如此

分廿餘話

安溪相國李文貞公養痾蒙 恩日賜玉泉山水二器

湯西崖少宰爲賦絕句八章今錄其二云間徵故事古

來無萬石流傳滿上都爭道相公清似水故教日送兩

宮壺異恩殊渥迥無倫康濟應先報國身東海平分千

斛水憶曾宣 勅到波臣注云往歲 土命郵傳日取

海水賜公皆異數也

居易錄

雍正八年 上以閣臣贊襄機務公正無私慎重周詳
事事妥協至誠之悃方之史冊所載一德一心之風洵
屬無愧宜加恩賜以勵臣工三韓馬文穆公虞山蔣文
肅公桐城張文和公各給一等輕車都尉永遠承襲仍
各加三級

雍正十一年故大學士張文端公入祠賢良諭祭於本
籍命大學士文和公給假還鄉舉行典禮 賜白金書
籍安車名馬及冠帶參藥之屬陛辭之日復手賜玉如
意一柄曰願爾往來事事如意又命中使頒賜酒筵餞
送

乾隆元年冬高安朱文端公病劇 上親往視之時文

端雖在危篤之中仍命二子扶掖立于榻下 上以溫
旨慰之時閣臣及部院大臣聯名具摺謝 恩起草爲
閣學諸城劉公卽今東閣大學士也余時爲中書當夜
直與繕寫之事迨文端旣歿 上復臨其第

乾隆五年七月 上賜滿漢大學士詩各一律于鄂文
端公有五載憂勤肩燹理兩朝寅亮首清班于張文和
公有古今政績如懸鑑時爲蒼生資惠鮮于福文端公
有每當資治披香日恰似談經絳帳時于查相國 郎阿
有玉陞資調理西郵運計籌趙泰安相國 國麟 有岱嶽
鍾靈秀闢疆播姓名之句皆確切不可移易

乾隆三年賜大學士嵇曾筠詩云此日黃扉資贊化昔

年絳帳憶談經

高其位八十生辰先二日 命文武大臣俱往稱慶至
日遣內大臣賚賜御書匾額及上方食用諸物

入旗通

志

乾隆六年辛酉九月九日桐城相國張文和公七秩誕
辰 上於行在賜御書匾額曰調元錫祉對聯曰忠誠
濟美三台麗弼亮延麻百福申詩曰厯掌絲綸佐斗樞
心依行在想晨趨最欣佳節當初度要識元衡半老儒
潞國晚年猶嬰鑠呂端大事不糊塗緘詩並寄黃花酒
看取灑灑湛露濡又賜御暖帽及蟒服數珠等物并蔬
菓酒筵 命詹事鄂容安總管內侍王太平率內務府

官賚至邸第宣 旨酌以金壘曰今日大學士七十生辰特賜壽酒相慶文和公載拜領受次日敬懸 宸翰 謙同朝諸公于邸第輦下榮之

趙泰安相國

國麟

蒙恩於紫禁城內乘車時人目爲車

丞相與漢田千秋北魏高允後先輝映史冊

按本朝大學士尙書六十以上奉 特旨得於紫禁

城內騎馬趙泰安以足疾不能騎馬特賜于紫禁城

內乘車後西林鄂文端公桐城張文和公已奉 旨

騎馬又欲援例乘車旋奉 旨于紫禁城內乘轎

史文靖公年逾八十亦蒙 恩於紫禁城內乘轎

乾隆七年內閣學士李紱以疾致仕回籍 上賜以詩

有學嘗兼慕陸節應上同疏 御注李紱平日講學謂朱子道問學之功居多陸九淵尊德性之見爲卓此語頗是又尤喜臨辭闕嘉謀實啟子 御注朕問有所欲陳否紱以慎終如始爲對實愜朕懷也

乾隆九年甲子錢塘徐文穆公得痰疾臥於京邸 上欲於南郊事畢枉駕視之時文穆居大外郎營門巷不足以及容鑾駕其子少宗伯 以炬 時爲翰林院侍讀學士親詣宮門懇辭乃于南郊回鑾時就近遣御前侍衛前往視之

乾隆九年重葺翰林院落成 車駕臨幸賜宴送大學士兼掌院學士鄂爾泰張廷玉進署以張說東璧圖書

府五律爲韻 上賦東音二韻有三台司道筦二老亮
天工及底希光舊史常此贊微躬之句因陳十八學士
登瀛洲故事 上顧大學士曰卿等無愧房杜朕願勿
逮唐太宗耳二臣惶恐避席奏言 陛下上法堯舜過
唐太宗遠甚臣等謏劣亦思孜孜日贊少効交修之責
然限于才力愧出房杜下有負 聖諭因頓首謝詞林典故

錢塘徐文穆公以疾于告歸里 上賜以詩 御製序
云大學士徐本以疾請致政暫允歸籍調理行有日矣
詩以賜之有尙期食履健重入綉扉崇之句次年 上
復賜以詩 御製序云卿歸里將一載矣比聞語言動

履漸卽輕便想血氣調和平復非久賁然有日跛子望
之炎夏火流林居差勝明湖鷺嶺間扶舁蕭散卿亦宜
有以自樂惟是幾暇從容清吟消夏興復不淺而曩時
廣和之侶卿乃遠在江湖懷不能已聊寄以詩又有所
願眠食佳早整歸朝駕之句其眷戀舊臣之意纏綿不
已

乾隆十年大學士鄂文端公有疾具疏乞休 上不允
所請賜之以詩 御製序云大學士鄂爾泰自去冬有
手足不仁之疾入春尙未痊可昨具疏乞休旣不允其
請詩以慰之及薨 上復臨其第賜之以詩有昆命我
須遵之句 御注雍正十三年 皇考遺詔以大學士

配享 太廟朕勿敢違

大學士福文端公七十壽辰 上賜以詩有允賴經綸
手猶疏弟子儀壽身兼壽世長佐太平基之句又 御
製序云大學士福敏久未入直爲賦長句賜之有氣象
光風却久違之句以文端公會爲太子師傅故詩語及
之

乾隆十年八月二十八日 賜宴瀛臺效栢梁體賦詩
外 上又製七言律四章有三世方明陪宴賞從教佳
話冠螭頭之句 御注云大學士張廷玉之父曾侍

皇祖西苑宴賞今與子若霽共陪此會亦盛事也

時若霽亦

官內閣 詞林典故

學士

乾隆十一年內閣學士沈德潛請假葬親 上賦五言
長律一章以寵其行 召見西暖閣垂問何日還朝恩
禮欵洽並允德潛請 特賜誥封三代 上復賦五言
律一章十二年丁卯假滿赴闕 上爲賦沈德潛乞假
葬親畢還朝五古詩一章賜之以請假時奏及還朝月
日故 聖製有朋友重然諾 況在君臣間之句以未還
朝先 命隨侍 皇子讀書故有善爲道孔顏之句 詞
林典故

乾隆十一年內閣學士沈德潛請假葬親并爲其父請
封 上允之復賜以詩 御製序云沈德潛爲其父請
封陳親遺訓聲泪俱下此所謂終身之慕乎甚嘉憫焉

從其請而賜之句有名成髮驚白錫數詔騰黃首邱陳
奠處不愧教忠堂之句

乾隆十四年賜桐城張文和詩職曰天職位天位君臣
同是任勞人休哉元老勤宣久允矣予心體恤頻潞國
十朝事堪例汾陽廿四考非倫曷茲百爾應知勸莫美
東門祖道輪 御製序云大學士張廷玉年幾入袞猶
日趨朝念其敬慎夙著特加優禮命五日一入內廷備
顧問如文彥博故事

乾隆十四年冬 賜桐城張文和詩有可例青田原佑
廟漫愁鄭國竟推碑 御製詩序云大學士勤宣伯張
廷玉先奉 皇考遺詔將來配享廟庭今經予告懇欵

陳情亟慮浮議將弗克邀 殊眷朕旣明頒詔旨并成
是詩書以賜之以爲左券也

桂林陳文恭公因病致政回籍 御製詩云粵西天末
相望遠祝爾平安歸里人又賜以 御用冠服

乾隆二十年大學士來文端公有疾 上親往視之是
日復往視予告大學士福文端公時已年逾八十自予
告以來凡遇大節 恩賚不減于在任時

乾隆二十二年 聖駕南巡賜在籍大學士溧陽史文
靖公終養協辦大學士尙書錢塘梁文莊公在籍食俸
二十三年賜予告大學士陳文勤公在家食俸

乾隆時 上以徐文穆公隨駕勞費每年賞內庫銀二

千兩後又增至四千兩

大學士傅忠勇公平定金川 御賜詩云安邊底績本
丹忠請命番苗勢已窮上將有心期利執大君無物不
包蒙那須一月間三捷果覺千忻達兩宮晉國勤勞予
厯念速歸黃閣贊元功 啟烏何須盡覆巢好生天地
德全包歌成宵雅八章句著得同人九四爻兵洗蓬姿
春澹蕩首稽儼狃面頰顛蜀民安撫勤籌畫心契元良
泰陞交 御製詩序云大學士傅恆經畧西川誅巨魁
破堅壘申明紀律大振軍威番苗窮蹙乞命大學士銳
意蕩平未許其請朕特宏解網之仁下詔班師召大學
士還朝襄贊勞績懋著詩以賜之

乾隆十年二月 御賜大學士史貽直品重綸扉匾額
十六年正月七十生辰 賜碩輔耆英匾額二十二年
在籍接 駕賜綠野頤和匾額二十六年八十生辰又
賜薇閣喬松匾額

乾隆二十二年 聖駕重幸江浙駐蹕邗上蔣文恪公
侍直 行殿 賜御書韋平世澤匾額

乾隆二十六年春二月蔣文恪公病於京邸賜第 上
親視之夏四月復視之既歿 上復臨其第

乾隆二十四年黃文襄公卒 御製輓詞云華燈廣樂
正陳時扼孽驚聞辰尾騎 慈慶朝儀難並輟強酬節
物淚雙垂屈指軍興逮五年儲胥事事合機先賣惟良

弼蒼生福痛惜摧心敢問天馬利軍行粟賑民彌留兩
事尙諄諄鞠躬盡瘁今誠已葛亮而來此一人運籌力
疾尙勞心驛館誰爲下鵲鍼賜賻行將歸故里椒漿寫
痛定親臨封疆歷三十餘年公正廉明眾共傳 皇考
時臣所餘幾鼻酸然復思愀然

故大學士黃廷桂靈柩至京 聖駕親往賜奠 御製
詩云事繁食少赤星頽易簪諄諄餉務裁公謹卒官父
子感馬光還陝士民哀忍將巫祝先桃茆載共公卿酌
玉巵奪我良臣一何遽不教留聽凱歌迴

御製餞休致大學士陳世倌歸里詩云夙夜勤勞言行
醕多年黃閣贊絲綸陳情無那愈孔偉食祿應教例鄭

均自是江湖憂未忘原非桑梓隱而淪老成歸告能無
惜 皇祖朝臣有幾人

御製輓原任大學士福龍翰先生詩云拖紳避省視易
簣慎初終自昔賜場嘆從今融帳空儀型先老宿啟迪
憶童蒙未及詢楹奠於斯恨莫窮

大學士史文靖公八十七生辰特遣侍郎伍齡安就第頒
賜御製壽詩云幡幡黃閣領朝裾矍鑠聯行尙弼予前
度庚辰淡墨榜兩看辛巳幹金書滿千卷似沈抄罷開
八秩過白注餘聲望老成需贊治名高漫卽擬懸車扁
額曰薇閣喬松對聯曰調元耆福昇平瑞周甲科名際
遇榮

御製九老會詩有元豐二相今猶在履道諸賢詎可方
之句 御注云大學士來保史貽直皆康熙間舊臣年
逾八秩較宋富弼文彥博之列耆英會榮有過焉

乾隆二十六年予告內閣學士鄒一桂年逾八十來京
慶祝 皇太后八旬萬壽蒙 恩加禮部侍郎銜在籍
食俸

乾隆二十六年及三十六年 皇太后萬壽均集在朝
王公文武大臣及在籍大臣來京祝嘏者 欽點二十
七人分作三班 賜遊香山其時在朝者前則有武英
殿大學士來保文淵閣大學士史貽直後則有東閣大
學士劉統勳協辦大學士尙書宮保刑部尙書前任體

仁閣大學士楊廷璋自本籍來京者後則有加禮部侍郎銜之內閣學士鄒一桂及內閣學士陸宗楷

協辦大學士尙書于敏中六十生辰奉 特旨加恩照大臣七十生辰例頒賚有耆瑞國華匾額

中書典故彙紀卷五

中書典故彙紀卷六

仁和王正功輯

錢塘趙輯寧校補

建置

今之內閣卽古中書省也其建置始於明永樂
間前代之建都或於金陵或於大都或於臨安
或於汴梁以及漢唐六朝五代南北各朝中書
省基址多不可攷 本朝建置多仍明舊故所
載皆自明始

大學士直舍所謂內閣也在午門東南隅外門西向閣
南向入門一小坊上懸聖諭過坊卽閣也閣制初甚隘

嘉靖十六年命工相度以文淵閣中一間奉孔子暨四配像旁四間各相間隔開戶於南以爲閣臣辦事之所閣東誥勅房裝爲小樓以貯書籍閣西制勅房南面隙地添造捲篷三間以處各官書辦而閣制始備

春明夢餘錄

會極門在皇極門之東凡京官上下接本俱於此處南入爲內閣輔臣票本處也

玉光劍氣集

文淵閣在午門之內迤東文華殿南磚城凡十間皆覆以黃瓦西五間中揭文淵閣牌牌下置紅櫃藏寶錄副本儘前楹設橈東西坐餘五間皆後列書櫃隔前楹爲退休之所天順間大學士李賢令人移紅櫃壁後欲設

公座大學士彭時曰不可殿閣皆至尊所御原設官之意止可侍坐以備顧問無正坐禮李誥塞意猶未已踰數日上遣太監傅恭送范銅飾金孔子并四配像一龕來置於中間又數日太監裴富送聖賢畫像一副來懸于龕後壁上乃罷不設焉

可齋筆記

王文端直題梁用之詩後謂內閣在東角門內常人所不能到其外爲文淵閣則翰林諸公所處也今內閣傍文淵而不在東角門之內諸學士所處則在左順門之南廊而旁爲東閣云

玉堂漫筆

東閣五間夾爲前後十間前中一間供先聖位爲諸輔臣分本公叙之所閣輔第四員以下則居後房雖白晝

亦秉燭票擬薛韓城當國特鑿一牖復開門構數椽以通日色及韓城賜死說者謂破壞風水然韓城卽不破壞風水能免此禍哉

烈皇小識

崇禎十五年八月上御朝畢登文昭閣閣在皇極殿東上步下閣御德政殿召五閣臣言文昭閣兩旁可建直房朕不時召對及講讀有疑問先生往來亦便翌日遂於閣左右各設直房

三朝野史

文淵閣在奉天門東廡之東文華殿之前前對皇城深嚴禁密百官莫敢望焉吏人無敢至其地閣中趨侍使令惟厨役耳防漏洩也禁密文書一小匣在几上鑰之而不合大學士暮出鑰其門匙懸門上恐禁中不時有

宣索也

震澤長語

弘治五年閣學士邱濬請於文淵閣近地別建重樓不用木植但用磚石將累朝實錄御製玉牒及干係國家大事文書盛一銅櫃皮于樓之上層如詔冊制誥行禮儀注前朝遺文舊事與凡內府衙門所藏文書可備異同纂修全史之用者盛以鐵櫃皮之下層

春明夢餘錄

宣德幸文淵閣命於閣右築石臺植澹紅芍藥一本景

泰初增植二本左純白右深紅

留青日札

文淵閣芍藥舊嘗有花自景泰增植後未嘗一開天順改元徐有貞許彬薛瑄李賢同入爲學士居中一本遂開四花其久而不落旣而三人皆去惟賢獨留明年

春忽各萌芽左二右三中則甚多而彭時呂原林文劉
定之李紹倪謙黃諫錢溥相繼同升學士凡八人賢約
開時共賞夏四月盛開八花遂設宴以賞之時賢有玉
帶之賜諸學士各賜大紅織衣且賜宴因名純白者曰
玉帶白深紅者曰宮錦紅澹紅者曰醉仙顏惟諫以足
疾不赴明日復開一花眾謂諫足以當之賢賦詩十章
閣院官寮咸和彙成曰玉堂賞花詩集

雙槐歲鈔

玉堂賞花會賦詩者四十人學士則南陽李賢安成
彭時樵李呂原蒲田林文安成李紹永新劉定之錢
塘倪謙東吳錢溥侍讀則金城黃諫詹事則廬陵陳
文長洲劉鉉侍講則眉山萬安漁陽李泰中允則古

杞孫賢贊善則范陽牛綸修撰則吳中陳鑑博野劉
吉錢塘童緣華容黎濤編修則西蜀李本毘陵王俱
餘姚戚瀾宜興徐溥瓊山邱濬泰和尹直安成彭華
雪川陳秉中臨川徐瓊四明楊守陳臨江吳滙檢討
則嚴州傅宗安成張業河東邢讓翰林五經博士則
天台鮑相典籍則西蜀李鑑泰和陳穀侍書則浙江
謝昭其二人則禮部員外郎臨淮凌耀宗中書舍人
江東曹冕詩成李賢序之彭時作後序潞水亭雜議
文淵閣石臺芍藥其花較時花碩而艷大學士有擷之
私第者傳玩數日不落春明夢餘錄

景泰中內閣賞芍藥賦詩本院官皆和之有玉堂賞花

集盛行於時成化末少傅徐溥在內閣賞芍藥賦二詩
次年又賦二詩本院官亦皆和之正德中大學士梁儲
楊一清賞芍藥唱和則人各四首按宣德八年本院諸
寮有文淵閣賞雪詩蓋詞林記事多有題詠不特賞花
而已

翰林記

入西華門數百步更入重門又百餘武有大門北嚮其
高與諸宮殿等爲三門以通中涓指謂余此故相府也
廣廷延袤老樹槎枿其間已而有堂巍然南向由堂背
以入中涓曰此相府後堂也其壯麗亦可敵諸宮殿楹
栢雜植皆數拱東南一樹亦老矣曰此五穀樹也由堂
背入甍棟逾壯麗曰此相府庭中十楹皆兩列其本相

距可十武而枝樛結爲門若虬龍對攫不可名狀曰丞相所植也自丞相府而西數百武復有門自西門而入西千武而始爲西門樓則大內矣

王介州史料

內閣庭中花臺上有芍藥三木相傳亦宣宗手植至今盛開

震澤長語

內閣二甃缸乃憲廟所賜種蓮者

謙齋集

出會極門之下曰佑國殿供元武像其東則承運庫再東曰香庫稍北有石牌曰古今通集庫以貯古今君臣像符券

燕史

重華宮之東南爲皇史宬藏太祖以來御筆實錄每年六月六日奏知晒晾司禮太監董其事左右小門爲鑄

厯左門鐫厯右門

同上

皇史宬藏本朝實錄處也按宬與盛同義莊子以筐宬
矢說文曰宬屋所容受也然殿命名于斯僅見耳

燕都

遊覽志

嘉靖十三年秋七月命建皇史宬於重華殿西欲置金
匱石室其中也勅館閣諸臣重書九朝實訓實錄藏之
大政記

皇史宬四周上下俱用石甃中具二十臺永陵定陵各
占其二

客燕雜記

皇史宬在重華殿西建于嘉靖十三年門額以史爲叟
以成爲宬左右小門曰鐫厯以龍爲鐫皆自上製字而

手書也中貯歷朝實錄寶訓每一帝山陵則開局纂修
告成焚稿椒園正本貯此

春明夢餘錄

皇史宬在東華門外之南做古石室之制梁柱門牕皆
用石與鐵向南門三東西隔各一中石臺座上陳
設金匱卽五朝實錄也旁有大厨尊藏玉牒大將
軍印亦貯焉石室前有兩廂貯雍正以後部通副本設
守尉三以八旗廢員充之守吏十六亦以八旗廢員充
之皆屬於典籍廳春秋晒晾實錄滿本堂司之送交副
本漢票簽司之典籍但司啟閉封識而已

乾隆十五年御製恭瞻皇史宬詩五代神謨秘典
垂崇宸局鑰壯宏規蘭臺令史無慙筆綸閣元臣有

職司

內閣所掌

百世聰聽欽

寶訓萬年永茂衍宗枝

玉牒並藏

此瑤函金匱前朝制殿鑿兢兢念在茲

附 皇史宬收貯大將軍印目

皇史宬貯大將軍印四十顆

平南大將軍 順治二年閏六月造

康熙十四年二月初六日給尙之孝

征南大將軍 順治三年九月造

平西大將軍 順治五年閏四月造

征西大將軍 順治六年六月造

揚威大將軍 順治九年九月造

康熙十三年十月初三日給簡親王

奉命大將軍 順治九年九月造

康熙十三年七月二十七日給康親王

定遠大將軍 順治九年九月造

寧南靖寇大將軍 順治十年十一月造

給順承郡王

定西大將軍 順治十二年十一月造

康熙十三年七月二十七日給貝勒董格

征西大將軍 順治十二年十一月造

安西大將軍 順治十二年十一月造

鎮北大將軍 順治十二年十一月造

征南大將軍 順治十二年十一月造

康熙十九年九月十三日給賴塔

靖西大將軍

順治十二年十二月造

以後二十二年造日俱同

鎮海大將軍

給劉元之

揚威大將軍

安南大將軍

給過賴塔

平東大將軍

鎮西大將軍

定北大將軍

安北大將軍

靖北大將軍

靖南大將軍

安東大將軍

寧海大將軍

平北大將軍

征北大將軍

鎮東大將軍

定東大將軍

撫遠大將軍

康熙十五年二月二十六日給圖海

二十九年七月初六日給裕親王

雍正八年十二月送往岳鍾琪九年五月交回

九年八月交忠達公馬爾賽十年十二月交回

定南大將軍

平西大將軍

靖東大將軍

定西大將軍

征東大將軍

鎮南大將軍

安遠大將軍 順治十四年十二月造

給貝勒商喜

定遠平寇大將軍 康熙十三年十月造

給安親王

奮武大將軍 康熙十七年十月造

本月給尙之信

靖邊大將軍 雍正十六年五月造

給傅爾丹

皇史宬又貯將軍印四十八顆

定南將軍 順治五年三月造

康熙十三年四月十七日給希爾根

靖南將軍 順治五年七月造

安西將軍 順治九年十月造

征西將軍

順治十二年二月造

以後二十七年
類造日俱同

給祁里德

鎮海將軍

平東將軍

安北將軍

康熙十四年五月給佟國綱

鎮海將軍

平南將軍

康熙十三年四月十七日給賴塔

靖安將軍

征北將軍

定東將軍

鎮南將軍

康熙十三年正月二十一日給尼雅漢

安南將軍

康熙十三年三月二十三日給華善

靖東將軍

鎮西將軍

康熙十三年二月初十日給席普臣

平北將軍

鎮東將軍

康熙十三年四月二十九日給拉哈大

征南將軍

中書ノ
康熙十五年十月初八日給穆占

安西將軍

康熙十三年正月給赫業

定北將軍

康熙二十年二月給瓦岱

撫遠將軍

康熙十三年八月初三日給貝勒尙善

又給貝勒查尼

靖西將軍

寧海將軍

康熙十五年七月給康熙親王

靖北將軍

鎮北將軍

平西將軍

定西將軍

給噶爾弼

定南將軍

征東將軍

安東將軍

安南將軍

順治十六年七月造

安南將軍

十七年八月造

給花喜

靖海將軍 康熙三年七月造

給施琅

蕩寇將軍 康熙十三年七月造

八月給順承郡王

平寇將軍 康熙十三年五月造

本月給根特巴圖魯

討逆將軍 康熙十三年七月造

八月給順承郡王

平逆將軍 康熙十四年三月造

四月給畢力克圖

十九年二月繳

靖逆將軍 康熙十五年七月造 給張勇

又康熙十四年三月造併發

靖寇將軍 康熙十五年七月造

八月二十六日給王輔臣

奮威將軍 康熙十五年九月造

本月給王進寶

雍正二年正月十八日給岳鍾琪

鎮平將軍 康熙十五年十二月造

本月給耿忠

征逆將軍 康熙十六年五月造

本月給劉進忠

綏遠將軍 康熙十八年十二月造

本月給蔡毓榮

雍正九年十一月交送歸化城撫遠大將軍

靖海將軍 康熙二十二年十月造

建勳將軍 雍正十年正月造

靖邊左副將軍 雍正十一年正月造

靖邊右副將軍 全時造

又貯一十九顆

揚威將軍 康熙十三年五月 日給阿密達

康熙三十四年八月給舒書

雍正十三年五月給哈元生

乾隆元年二月交還

定海將軍 康熙十七年十二月初十日給王之鼎

建威將軍 康熙十四年三月十五日給鄂泰

三十三年五月初九日給右衛將軍
希福

昭義將軍 康熙十八年八月十三日給馬承賡

勇畧將軍 康熙十八年十二月二十三日給趙良棟

懷忠將軍 康熙十九年閏八月初九日給海潮龍

昭武將軍 康熙三十二年三月二十二日給郎談

雍正九年正月送交查郎阿

鎮安將軍 康熙十四年八月十五日給噶爾漢

雍正七年十月送交涼州將軍

討寇將軍 康熙十四年十二月十五日給尙之信

靖邊大將軍

定邊大將軍

定邊右副將軍

振武將軍

雄武將軍

威遠將軍

鎮安將軍

振威將軍

揚武將軍

寧遠大將軍

皇明紀畧云嘗聞印綬監一老內使云國初鑄將軍印十六顆見行者十顆卽征西征南征虜征蠻諸印是也餘貯御榻之側有事則請而行之又按條例國初鑄將軍印紐有立虎伏虎單火珠雙火珠之別其文則皆風字篆取其神速也

順治八年正月移內三院衙署於紫禁城內

曹習菴宰

輔拜罷小志

內閣北垣下有楮一株歲久成陰相國澤州公機務之暇時一憇焉泰州禹之鼎繪成楮廳圖公自題七律二章一時和者甚眾

內閣堂上懸調和元氣匾額乾隆九年御書也堂外

懸機密重地一應官員閑雜人等不許擅入違者罪不
饒清漢書 諭旨堂之東廂面西者爲漢票簽房中一
間爲侍讀擬寫草簽處北一間爲中書繕寫眞簽處南
一間爲收貯本章檔案處堂之西廂面東者爲蒙古堂
漢票簽房之南面城者爲漢本堂蒙古堂之南面城者
爲滿本堂上皆覆以黃瓦又堂之東爲滿票簽房堂之
西爲稽察房今改爲中堂齋宿之所堂之後爲中堂齋宿之所今分
一稽察房又東爲滿票簽檔子房又西爲典籍廳中二間
爲典籍辦事之所東一間爲小庫以貯緊要物件西二
間爲南廳供事存貯檔案之所廳之西廂三間一爲北
廳供事存貯檔案之所二爲銀庫領到飯銀分發存貯

之所滿本堂之西爲祝板房

繕寫大祀祝板之所

上皆覆以甌瓦

獨誥勅房在內閣門外舊會典館之北牌樓門之南共五間

大庫在內閣後門外之東文華殿之南其北面有圍牆一帶開門二其西爲典籍廳請送關防及查取紅本出入之門其東爲滿本堂請送實錄出入之門庫坐南向北共二十間開門四每間深四丈重之以樓北面有廳廳中用鐵柱柱內有窟窿外有鐵板聽聽開而不闔惟上御文華殿經筵及出東華門則以繩繫之過卽開西二門共庫十間可通往來樓上樓下皆貯紅本典籍關防亦貯其中東二門內庫各五間一爲滿本堂存貯

實錄史書錄疏起居注及前代帝王功臣畫像等物
一爲存貯書籍及三節表文表匣及外藩表文之所近
因西二庫紅本已貯滿乾隆十三年以後紅本亦貯於
此

內閣大堂前有垂花門東西各有耳門乾隆十一年將
兩耳門堵塞至十三年冬始復開東一門三年之內大
學士正法者訥親賜帛者慶復其時因事罷職後仍復
任者海寧陳文勤公因事拿問旋復協辦大學士事者
尙書阿文勤公解大學士任者三韓高公斌查公郎阿
其餘因病乞休及左遷者學士內尙有數人風水之說
其果有乎因憶雍正八年修理內閣疏濬溝道鍾大常

衡曹方伯

繩柱

其時皆爲中書議溝從前則利中而不

利陞從後則利陞而不利中卒從利中者開溝是年考
授中書四十三人後中進士者九人內田志勤癸丑榜
眼林志春丁巳榜眼涂逢震己未榜眼十三年考授中
書二十人後中進士者六人內金德瑛丙辰狀元乾隆
二年考授中書四十人後中進士者十人內秦勇均已
未探花湯大紳壬戌探花七年考授中書四十人後中
進士者十四人內錢維城王際華乙丑科狀元探花梁
國治戊辰科狀元盧文弨壬申科探花至甲戌科而莊
培因倪承寬又復中狀元探花其會試之總裁錢維城
送歸第之府丞申甫皆壬戌考取之中書也可謂極一

時之盛其餘選庶吉士及部曹者每科尙有數人至庚戌中書登鼎甲者皆榜眼丁巳中書登鼎甲者皆探花乙卯中書取數少故鼎甲亦少然金德瑛係今上登極首拔狀元歷掌文衡仕至左都御史若壬戌中書登鼎甲者三狀元三探花爲前此所莫及今丁丑庚辰辛巳榜眼梅立本諸重光胡高望及辛巳探花趙翼皆十九年考授中書也其召試中書後經中式者自壬申至壬辰共□人內金榜壬辰狀元沈初韋謙恆癸未榜眼探花其由會試荐卷用爲中書而中狀元者辛卯黃軒乙未吳錫齡也中榜眼探花者乙未之汪鏞沈清藻也壬辰薦卷用爲中書者二十二人至乙未會試中式者

六人而三鼎甲皆在其中亦一時之盛事也其援例中書中狀元者庚辰畢沅也

保和殿在乾清門之前中和殿在保和殿之前文華殿在東華門內內閣之北武英殿在西華門內國史館之北文淵閣體仁閣皆在太和殿之旁

中書典故彙紀卷六